

**თბილისის ვანო სარაჯიშვილის სახელობის სახელმწიფო კონსერვატორიის სასწავლო პროცესის**  
**მარეგულირებელი წესი**

**1. თბილისის სახელმწიფო კონსერვატორიაში სტუდენტის სტატუსის მინიჭება**

1.1. საბაკალავრო პროგრამაზე ჩარიცხვისა და სტუდენტის სტატუსის მოპოვების საფუძველია შემოქმედებითი ტურებისა და ერთიანი ეროვნული გამოცდების შედეგები.

1.2. სამაგისტრო პროგრამაზე ჩარიცხვა და სტუდენტის სტატუსის მოპოვება ხორციელდება კონსერვატორიის მაგისტრატურაში მიღების წესის შესაბამისად: საშემსრულებლო და კომპოზიციის საგანმანათლებლო პროგრამებზე შემოქმედებითი ტურების საფუძველზე. მუსიკის თეორიის/ისტორიის, ეთნომუსიკოლოგიის, საეკლესიო მუსიკოლოგიის პროგრამებზე შემოქმედებითი ტურებისა და ერთიანი ეროვნული გამოცდების შედეგების საფუძველზე.

1.3. სადოქტორო პროგრამებზე ჩარიცხვა და სტუდენტის სტატუსის მოპოვება ხორციელდება კონსერვატორიის დოქტორანტურაში მიღების წესის შესაბამისად.

1.4. პროფესიულ პროგრამაზე (IV,V საფეხური) ჩარიცხვისა და პროფესიული სტუდენტის სტატუსის მოპოვების საფუძველია შემოქმედებითი ტურებისა და ერთიანი ეროვნული გამოცდების (უნარ-ჩვევები) შედეგები.

1.5. სტუდენტის სტატუსის შენარჩუნებისათვის აუცილებელია რეგისტრაციის გავლა კონსერვატორიაში დადგენილი წესების დაცვით.

1.6. სტუდენტთა სემესტრული რეგისტრაცია ხორციელდება 2 ეტაპად: ადმინისტრაციული – ბანკში სწავლის საფასურის გადახდით და აკადემიური (საგნობრივი) – შესაბამისი ფაკულტეტის დეკანატში.

**2. კონსერვატორიაში მობილობის და აღდგენის წესით ჩარიცხვა**

2.1. კონსერვატორიაში მობილობის, ან აღდგენის წესით ჩარიცხვა ხორციელდება განათლებისა და მეცნიერების სამინისტროს მიერ კანონმდებლობით დადგენილი წესისა და კონსერვატორიაში მოქმედი წესის შესაბამისად.

2.2. მობილობის უფლება აქვს პირს, რომლის დაწესებულებაში ჩარიცხვა განხორციელდა კანონმდებლობით დადგენილი წესით და ელექტრონულ პორტალზე მობილობის მსურველად რეგისტრაციის მომენტისათვის არის:

- აკრედიტებული დაწესებულების სტუდენტი;
- არაკრედიტებული უმაღლესი საგანმანათლებლო დაწესებულების სტუდენტი, რომელსაც გავლილი საგანმანათლებლო პროგრამის ნაწილი კანონმდებლობით დადგენილი წესით აკრედიტებულად ეთვლება.
- მობილობის უფლება ასევე აქვთ ამ მუხლის პირველი და მეორე პუნქტებით გათვალისწინებულ პირებს, რომლებსაც ელექტრონულ პორტალზე რეგისტრაციის მომენტისათვის შეჩერებული აქვთ დაწესებულების სტუდენტის სტატუსი.
- მობილობის უფლება სტუდენტს წარმოეშობა უმაღლესი განათლების შესაბამის საფეხურზე სწავლების ერთი წლის შემდეგ, სწავლების პერიოდში არ შედის ის დრო, რომლის განმავლობაშიც პირს შეჩერებული ჰქონდა სტუდენტის სტატუსი. აგრეთვე იმ პირებს, რომლებსაც ელექტრონულ პორტალზე რეგისტრაციის მომენტისათვის შეწყვეტილი აქვთ სტუდენტის სტატუსი, თუ სტატუსის შეწყვეტიდან არ არის გასული 12 თვეზე მეტი **(23.03.2013)**.
- მობილობის უფლებით სარგებლობენ საქართველოს განათლებისა და მეცნიერების მინისტრის 2010 წლის 4 თებერვლის # 10/ნ ბრძანებით დამტკიცებული წესის ამოქმედებამდე გარიცხული/ამორიცხული სტუდენტები, მათი გარიცხვა/ამორიცხვის შესახებ ბრძანების გამოცემიდან 10 წლის განმავლობაში.

2.3. კონსერვატორიის საბაკალავრო და სამაგისტრო პროგრამებზე სტუდენტთა მობილობა ხორციელდება კალენდარული წლის განმავლობაში ერთხელ, შემოდგომის სემესტრის დაწყებამდე. სადოქტორო პროგრამებზე წელიწადში ორჯერ, სასწავლო სემესტრის დაწყებამდე, ხარისხის განვითარების ეროვნული ცენტრის მიერ დადგენილ ვადებში **(23.03.2013)**.

### **3. ერთიანი ეროვნული/სამაგისტრო გამოცდების გარეშე ჩარიცხვა/გადმოყვანა**

3.1. უცხო ქვეყნის მოქალაქეების, მოქალაქეობის არმქონე პირთა და საქართველოს მოქალაქეთა, რომელთაც კანონით მინიჭებული აქვთ უფლება სწავლა გააგრძელონ საქართველოს აკრედიტებულ უმაღლეს საგანმანათლებლო დაწესებულებაში ერთიანი ეროვნული/სამაგისტრო გამოცდების გავლის გარეშე, კონსერვატორიაში ჩარიცხვა/გადმოყვანა ხორციელდება საქართველოს განათლებისა და მეცნიერების სამინისტროს მიერ კანონმდებლობით დადგენილი და კონსერვატორიაში მოქმედი წესების შესაბამისად.

### **4. კონსერვატორიის სტუდენტის სტატუსის შეჩერება**

4.1. სტუდენტის სტატუსის შეჩერების საფუძველია:

- ადმინისტრაციული რეგისტრაციის გაუვლელიობა (ფინანსური დავალიანება);
- დავალიანება საკვალიფიკაციო გამოცდაზე/ ნაშრომში.
- აკადემიური შვებულება (აკადემიური შვებულება შესაძლებელია გაფორმდეს სტუდენტის პირადი განცხადების საფუძველზე სასწავლო პროცესის დაწყებიდან არაუგვიანეს 4 კვირისა)
- ავადმყოფობა;
- უცხო ქვეყანაში, უმაღლეს საგანმანათლებლო დაწესებულებაში სწავლა;
- კონსერვატორიის წესდებით გათვალისწინებული სხვა გარემოებები.

4.2. სტუდენტის სტატუსის შეჩერების შემთხვევაში, მისი ხელახლა მოპოვება შესაძლებელია დადგენილ ვადებში ადმინისტრაციული რეგისტრაციის გავლის შემდეგ. სტუდენტის აღდგენა ხორციელდება იმ სემესტრის დასაწყისში, რომელშიც შეუჩერდა სტატუსი, გარდა 4.4 პუნქტით გათვალისწინებული შემთხვევებისა (24.09.2013).

4.3. სადოქტორო პროგრამის, გაცვლითი პროგრამის, საკვალიფიკაციო გამოცდაზე დავალიანების გამო სტატუსშეჩერებული სტუდენტის სტატუსის აღდგენა შესაძლებელია ნებისმიერი სემესტრის დასაწყისში, ან სემესტრის განმავლობაში, მაგრამ არაუგვიანეს 1 თვისა საკვალიფიკაციო გამოცდის ჩატარებამდე. სტატუსის აღდგენის მოთხოვნით ნებისმიერი სემესტრის დასაწყისში კონსერვატორიას შეუძლია მიმართოს აგრეთვე დამამთავრებელი კურსის (VII-VIII სემესტრის) სტუდენტმა, ან ნებისმიერი სემესტრის სტუდენტმა დავალიანებაში არსებული სასწავლო კურსების გავლის მიზნით, თუ ეს სასწავლო კურსები მიმდინარე სემესტრში იკითხება (24.09.2013).

4.4. შეჩერებული სტატუსი პირს უნარჩუნდება 5 წლის განმავლობაში. სტუდენტის სტატუსის შეჩერებიდან 5 წლის შემდეგ პირს ავტომატურად უწყდება სტუდენტის სტატუსი, გარდა კანონმდებლობით გათვალისწინებული შემთხვევისა.

4.5. პირი, რომელსაც შეჩერებული აქვს სტუდენტის სტატუსი, სარეესტრო მონაცემებში რეგისტრირებულია სტატუს შეჩერებულ სტუდენტად და არ განიხილება კონსერვატორიის სტუდენტების საერთო რაოდენობის ფარგლებში. სტუდენტთა რაოდენობის აღრიცხვის მიზნით, ფაკულტეტის დეკანი ვალდებულია უზრუნველყოს რეესტრში სტუდენტის სტატუსის შეჩერების რეგისტრაცია.

## 5. კონსერვატორიის სტუდენტის სტატუსის შეწყვეტა

5.1. სტუდენტის სტატუსის შეწყვეტის საფუძველია:

- საგანმანათლებლო პროგრამის დასრულება მოცემულ საფეხურზე;
- პირადი განცხადება;
- შესაბამისი საგანმანათლებლო პროგრამის მოთხოვნების შეუსრულებლობა აკადემიური ხარისხის მოსაპოვებლად დადგენილ ვადებში.
- ერთი და იმავე სასწავლო კურსის (საგნის) სამჯერ გავლა და კრედიტის ვერ მიღება.
- საკვალიფიკაციო გამოცდაზე დავალიანების ორჯერ არსებობა.
- კონსერვატორიის წესდებით დადგენილი სხვა შემთხვევები.

5.2. სტუდენტის სტატუსის შეჩერების შესახებ სამართლებრივი აქტი დგება სესიის დასრულების შემდეგ.

5.3. სტუდენტის სტატუსის შეწყვეტის შესახებ სამართლებრივი აქტით გათვალისწინებული სამართლებრივი შედეგები დგება ბრძანების გამოცემიდან ერთი წლის შემდეგ. დროის ამ მონაკვეთში სტუდენტის სტატუსი ითვლება შეჩერებულად და სტუდენტი უფლებამოსილია ისარგებლოს მობილობის უფლებით.

5.4. პირები, რომელთაც წესის ძალაში შესვლიდან აკადემიური მოუსწრებლობის მიზეზით შეუწყდათ კონსერვატორიის სტუდენტის სტატუსი, ვერ ისარგებლებენ მობილობის ფარგლებში კონსერვატორიაში აღდგენის უფლებით.

## 6. კონსერვატორიაში სტატუსშეწყვეტილი სტუდენტის აღდგენა

6.1. სტუდენტის სტატუსის შეწყვეტის შემთხვევაში, მისი ხელახლა მოპოვება დასაშვებია კანონმდებლობით დადგენილი წესით – საქართველოს განათლებისა და მეცნიერების მინისტრის 2010 წლის 4 თებერვლის ბრძანება #10 /ნ-ის შესაბამისად.

6.2. საქართველოს განათლებისა და მეცნიერების მინისტრის 2010 წლის 4 თებერვლის # 10/ნ ბრძანების ძალაში შესვლამდე გარიცხული/ამორიცხული სტუდენტი განიხილება სტუდენტის სტატუსის შეჩერებულ პირად გარიცხვის/ამორიცხვის შესახებ ბრძანების გამოცემიდან 10 წლის განმავლობაში და ამ ვადაში უფლებამოსილია მიმართოს კონსერვატორიას სტუდენტის სტატუსის აღდგენის თაობაზე.

## 7. კონსერვატორიაში სწავლის წლიური გადასახადი

7.1 საქართველოს მოქალაქეებისათვის:

- პროფესიულ საგანმანათლებლო პროგრამებზე (IV, V საფეხური) – 2250 ლარი
- ბაკალავრიატი – 2250 ლარი
- მაგისტრატურა – 3000 ლარი (09.02.2015)
- დოქტორანტურა – 3200 ლარი (09.02.2015)

7.2. უცხო ქვეყნის მოქალაქეებისათვის:

- ბაკალავრიატი – 4000 ევრო (24.02.2014)
- მაგისტრატურა – 5000 ევრო (24.02.2014)
- დოქტორანტურა - 5000 ევრო

7.3. იმ შემთხვევაში, როდესაც არსებობს პრეფერენციული (უფრო დაბალი) ტარიფით გაფორმებული ხელშეკრულება, სტუდენტს სასწავლო პროგრამით გათვალისწინებულ ვადებში უნარჩუნდება ხელშეკრულებით დადგენილი საფასურის ოდენობა.

7.4. აკადემიურ შვებულებაში მყოფი სტუდენტის აღდგენის შემთხვევაში სწავლის საფასური განისაზღვრება 7.3. პუნქტით დადგენილი ტარიფით.

7.5. სახელმწიფო გრანტით ნაწილობრივი დაფინანსების მქონე სტუდენტებმა სახელმწიფო დაფინანსებასა და სწავლის რეალურ საფასურს შორის სხვაობა უნდა დაფარონ ადმინისტრაციული რეგისტრაციისათვის დადგენილ ვადებში.

## 8. სასწავლო პროცესი

8.1. თბილისის სახელმწიფო კონსერვატორია ახორციელებს უმაღლეს აკადემიურ (საბაკალავრო, სამაგისტრო, სადოქტორო) და პროფესიულ (IV, V საფეხურები) საგანმანათლებლო პროგრამებს.

8.2. საგანმანათლებლო პროგრამა დამთავრებულად ითვლება, თუ სტუდენტი დააგროვებს შესაბამისი პროგრამით გათვალისწინებული კრედიტების რაოდენობას, მაგრამ არანაკლებ:

- საბაკალავრო პროგრამაზე - 240 კრედიტს;
- სამაგისტრო პროგრამაზე - 120 კრედიტს;
- სადოქტორო პროგრამაზე - 180 კრედიტს.

8.3. კონსერვატორიაში სწავლება ხორციელდება სემესტრულად. ერთი სემესტრის ხანგრძლივობა შეადგენს 19 (სასწავლო და სასესიო) კვირას. სრული აკადემიური წელი მოიცავს 38 კვირას.

სასწავლო კვირები ეთმობა მეცადინეობებისა და შუასემესტრული გამოკითხვების ჩატარებას, ხოლო სასესიო კვირები - საბოლოო გამოცდების ჩატარებასა და აკადემიური დავალიანებების დაფარვას.

8.4. სწავლება წარიმართება მეცადინეობის სხვადასხვა ფორმების საშუალებით, როგორცაა სალექციო, ინდივიდუალური, ჯგუფური, პრაქტიკული, სასემინარო, სარეპეტიციო მეცადინეობები და სხვა.

თითოეული სასწავლო კურსი, მისი თავისებურებებიდან გამომდინარე, ითვალისწინებს სწავლების ზემოთჩამოთვლილ ერთ, ან რამდენიმე ფორმას. სასწავლო კურსის ხანგრძლივობა 1 სემესტრია.

## 9. სტუდენტთა ცოდნის შეფასება-შემოწმების სისტემა

9.1 არსებული კანონმდებლობით ECTS -ის საკრედიტო სისტემაში სტუდენტთა ცოდნის შეფასება ხდება შემდეგი სქემით:

ქულები აღნიშვნა	ქულების ასოითი	შეფასების აღნიშვნა
91 _ 100	A	ფრიადი
81 – 90	B	ძალიან კარგი
71 _ 80	C	კარგი
61 _ 70	D	დამაკმაყოფილებელი
51 _ 60	E	საკმარისი
41 – 50	FX	ვერ ჩააბარა
0 – 40	F	ჩაიჭრა

9.2. დოქტორანტურის საფეხურზე სადისერტაციო ნაშრომისა და დამაბოლოებელი საკონცერტო გამოსვლის შეფასება ხორციელდება შემდეგი სქემით:

- ფრიადი (**summa cum laude**) – შესანიშნავი ნაშრომი.
- ძალიან კარგი (**magna cum laude**) – შედეგი, რომელიც წაყენებულ მოთხოვნებს ყოველმხრივ აღემატება.
- კარგი (**cum laude**) – შედეგი, რომელიც წაყენებულ მოთხოვნებს აღემატება
- საშუალო (**bene**) – შედეგი, რომელიც წაყენებულ მოთხოვნებს ყოველმხრივ აკმაყოფილებს.
- დამაკმაყოფილებელი (**rite**) – შედეგი, რომელიც, ხარვეზების მიუხედავად, წაყენებულ მოთხოვნებს მაინც აკმაყოფილებს.
- არადამაკმაყოფილებელი (**insufficienter**) – შედეგი, რომელიც წაყენებულ მოთხოვნებს მნიშვნელოვანი ხარვეზების გამო ვერ აკმაყოფილებს.
- სრულიად არადამაკმაყოფილებელი (**sub omni canone**) – შედეგი, რომელიც წაყენებულ მოთხოვნებს სრულიად ვერ აკმაყოფილებს.

9.3. სტუდენტის ცოდნის შეფასება ხორციელდება ყოველ სემესტრში და გარკვეული შეფარდებით ითვალისწინებს შუასემესტრული/მიმდინარე და დასკვნითი გამოცდის შეფასებებს. სემესტრული შეფასება მიიღება შუასემესტრული/მიმდინარე და დასკვნითი გამოცდის შეფასებების დაჯამების გზით.

9.4 შეფასება საკვალიფიკაციო გამოცდაზე (სასწავლო მოდულის დამაბოლოებელი გამოცდა) მრავალკომპონენტია და სტუდენტი ფასდება 100 ქულით.

9.5. სასწავლო კურსში (საგანში) კრედიტის მოსაპოვებლად სტუდენტმა უნდა დააგროვოს ქულათა ჯამური ოდენობა 51 დან 100 მდე.

9.6. დასკვნით გამოცდაზე გასვლის უფლება ეძლევა სტუდენტს, რომელსაც:

- მიღებული აქვს მონაწილეობა სილაბუსით/მინიმალური სტანდარტით გათვალისწინებულ შემოწმების ყველა ფორმაში დაგროვილი აქვს “სტუდენტთა ცოდნის შეფასება-შემოწმების სტანდარტით” გათვალისწინებულ შუასემესტრულ შეფასებებში მინიმუმ 11 ქულა.
- აკმაყოფილებს გამოცდაზე დაშვების დამატებით წინაპირობებს, რომლებიც მითითებულია შესაბამისი სასწავლო კურსის სილაბუსში (ასეთის არსებობის შემთხვევაში).
- შესრულებული აქვს დისციპლინარული მოთხოვნები. იხ. 9.9.

9.7. დასკვნითი გამოცდა არ უნდა შეფასდეს 40 ქულაზე მეტით. დასკვნით გამოცდაზე დადებით შეფასებად ჩაითვლება დადგენილი მაქსიმუმის ნახევარზე მეტი. უარყოფითი შეფასება დაჯამებას არ ექვემდებარება.

9.8. 41-50 ქულის სემესტრული ჯამური შეფასების პირობებში სტუდენტი ვერ იღებს კრედიტს, მაგრამ ეძლევა უფლება გადააბაროს გამოცდა სასწავლო დისციპლინის გამეორების გარეშე მიმდინარე სემესტრში, დადგენილ ვადებში.

გადაბარებას დისციპლინის გამეორების გარეშე მიმდინარე სემესტრში არ ექვემდებარება საკვალიფიკაციო გამოცდა/ნაშრომი, დოქტორანტურის საფეხურზე დამაბოლოებელი საკონცერტო გამოსვლა და სადისერტაციო ნაშრომი. დოქტორანტურის საფეხურზე დამაბოლოებელი საკონცერტო გამოსვლასა და სადისერტაციო ნაშრომში დავალიანების დაფარვის წესი განისაზღვრება კონსერვატორიის სადისერტაციო საბჭოს დებულებით.

9.9. თუ სტუდენტის მიერ სემესტრის მანძილზე დაგროვილი ქულათა ჯამი არ აღემატება 40 ქულას, სტუდენტი ვალდებულია გაიმეოროს კურსი და დავალიანება დაფაროს დადგენილი წესის მიხედვით. იხ. პუნქტი 10.

9.10. სასწავლო პროგრამით გათვალისწინებული მეცადინეობების გაცდენებთან დაკავშირებით მოქმედებს შემდეგი წესი:

- სასწავლო კურსებში – საგუნდო კლასი და ორკესტრი 15-ზე მეტი საათის არასაპატიო მიზეზით გაცდენის შემთხვევაში სტუდენტი არ დაიშვება სემესტრის დასკვნით გამოცდაზე.
- ყველა სხვა სასწავლო კურსით გათვალისწინებული მეცადინეობების საერთო რაოდენობის 1/3-ზე მეტი არასაპატიო მიზეზით გაცდენის შემთხვევაში სტუდენტი არ დაიშვება სემესტრის დასკვნით გამოცდაზე.

9.11. 9.10 პუნქტის მეორე ქვეპუნქტით გათვალისწინებული მოთხოვნები შესაძლებელია არ გავრცელდეს იმ პირებზე, რომლებიც უკვე ფლობენ პროგრამის დასრულების შედეგად მისანიჭებელ აკადემიურ ხარისხს. ამ პირთა მეცადინეობებზე დასწრების ვალდებულების საკითხს წყვეტს სპეციალური კომისია, რომელიც ინიშნება დეკანის ბრძანებით **(28.09.2012)**.

## **10. დავალიანების დაფარვის წესი (16.09.2014)**

10.1. სტუდენტმა სასწავლო წლის მანძილზე უნდა გაიაროს სასწავლო გეგმით გათვალისწინებული საგნები. სასწავლო კურსებში/მოდულებში დავალიანების შემთხვევაში სტუდენტს უფლება აქვს გადავიდეს მომდევნო კურსზე, თუკი ეს დავალიანება შეადგენს სასწავლო წლის მანძილზე მოსაპოვებელი კრედიტების სულ მცირე 50%.

## **10.2. სასწავლო კურსებში დავალიანების დაფარვის წესი**

- სპეციალობის დისციპლინებში, საორკესტრო ან საგუნდო კლასში დავალიანების დროს სტუდენტს არ უჩერდება სტატუსი და ამ დისციპლინაში კრედიტის მოპოვების საშუალება ეძლევა დამატებით სემესტრში სწავლის გაგრძელების გზით.
- ძირითადი სამუსიკო დისციპლინების მოდულის სასწავლო კურსებში კრედიტის მოუპოვებლობის შემთხვევაში სტუდენტი წყვეტს მოდულის შესწავლას. დავალიანების დასაფარად სტუდენტი გადის აკადემიურ რეგისტრაციას, იხდის თანხას დადგენილი ტარიფის შესაბამისად და იმეორებს მოდულის იმ ნაწილს, რომელშიც ჰქონდა დავალიანება.

- მუსიკის ისტორიისა და ჰუმანიტარული დისციპლინების მოდულის სასწავლო კურსებში კრედიტის მოუპოვებლობის შემთხვევაში, სტუდენტი არ წყვეტს მოდულის შესწავლას (შესაძლებელია მუსიკის ისტორიის და ჰუმანიტარული დისციპლინების მოდულის 2 კურსის პარალელურად გავლა). დავალიანების დასაფარად სტუდენტი გადის აკადემიურ რეგისტრაციას, იხდის თანხას დადგენილი ტარიფის შესაბამისად და იმეორებს მოდულის იმ ნაწილს, რომელშიც ჰქონდა დავალიანება.

### 10.3. საკვალიფიკაციო გამოცდებში/ ნაშრომებში დავალიანების დაფარვის წესი

- საკვალიფიკაციო გამოცდაზე/ნაშრომში დავალიანება (კრედიტის მოუპოვებლობა) სტუდენტის სტატუსის შეჩერების საფუძველია. სტატუსის აღსადგენად სტუდენტი რეგისტრაციას გადის წინამდებარე წესის მე-4 მუხლით დადგენილ ვადებში **(05.06.2013)**.
- საკვალიფიკაციო გამოცდის დავალიანების დაფარვა სტუდენტს შეუძლია ადმინისტრაციული და აკადემიური რეგისტრაციის გავლის შემთხვევაში. სასწავლო პროგრამაში რამდენიმე საკვალიფიკაციო გამოცდის არსებობის შემთხვევაში სტუდენტს უფლება აქვს აკადემიური რეგისტრაციის განაცხადში მიუთითოს დავალიანებაში არსებული მხოლოდ ერთი დისციპლინა. განაცხადში მითითებულ საკვალიფიკაციო გამოცდაზე არ გამოცხადება, ან შეფასება 51 ქულის ქვევით სტუდენტის სტატუსის შეწყვეტის საფუძველია, გარდა მნიშვნელოვანი პატივსაცემი გარემოებებისა **(05.06.2013)**.
- დავალიანების დაფარვის მსურველ სტუდენტს, სურვილის შემთხვევაში შეუძლია აიყვანოს ხელმძღვანელი. რეგისტრაციის გავლისას სტუდენტი დეკანის სახელზე წერს განცხადებას ხელმძღვანელის/კონსულტანტის დანიშვნის თაობაზე, რაც ავალდებულებს მას გადაიხადოს სასწავლო კურსის შესატყვისი თანხა.

### 11. შუასემესტრული/მიმდინარე შეფასების და დასკვნითი გამოცდის შეფასების ვადები და პროცედურები

11.1 შუასემესტრული შემოწმებების ფორმებს და ვადებს, ქულათა თანაფარდობას და გამოცდაზე გასვლის წინაპირობას ადგენს შესაბამისი მიმართულება საგანმანათლებლო პროგრამის და დისციპლინის მიზნების და ამოცანების გათვალისწინებით.

11.2. შუასემესტრული/მიმდინარე შემოწმების ჩატარების თარიღებს სასწავლო სემესტრის დასაწყისში ადგენს ფაკულტეტის დეკანი მიმართულების ხელმძღვანელთან შეთანხმებით.

11.3. პედაგოგს უფლება აქვს შესაბამისი ფაკულტეტის დეკანთან შეთანხმებით შუასემესტრული შემოწმება გადაუვადოს სტუდენტებს, რომლებიც საპატიო მიზეზის გამო ვერ დაესწრნენ შემოწმებას (ავადმყოფობა, შემოქმედებითი მივლინება და ა.შ.). გადავადებული შემოწმების ჩატარების თარიღს განსაზღვრავს საგნის წამყვანი პედაგოგი ფაკულტეტის დეკანთან შეთანხმებით.



11.4. სასწავლო დისციპლინაში დასკვნითი გამოცდისათვის ინიშნება 2 თარიღი. დასკვნით და შესაბამის დამატებით გამოცდას შორის შუალედი უნდა იყოს არა ნაკლებ 10 დღისა. დამატებითი გამოცდის თარიღი ინიშნება სასესიო პერიოდის I ეტაპის დასრულების შემდეგ იმ სტუდენტებისათვის, ვინც:

ა) საპატიო მიზეზით დასკვნით გამოცდაზე არ გამოცხადდა **(21.02.2014)**

ბ) დასკვნით გამოცდაზე ვერ მიიღო დადებითი შეფასება.

გ) დასკვნით გამოცდაზე მიიღო დადებითი შეფასება, მაგრამ ჯამურად დააგროვა ქულათა ოდენობა 41-50.

11.5. განსაკუთრებულ შემთხვევებში, დეკანის გადაწყვეტილებით შესაძლებელია სტუდენტს დაენიშნოს დამაბოლოებელი გამოცდა მიმდინარე სემესტრის სასესიო პერიოდის დაწყებამდე, ან მომდევნო სასწავლო სემესტრის დაწყებიდან 10 დღის ვადაში.

11.6. სესიის ვადები ასახულია აკადემიურ კალენდარში, რომელიც მტკიცდება აკადემიური საბჭოს გადაწყვეტილებით.

11.7. სასესიო ცხრილს ადგენს სასწავლო დეპარტამენტი. სასწავლო დეპარტამენტი ითვალისწინებს დეკანის/კოორდინატორის და სტუდენტთა რეკომენდაციებს გამოცდების თანამიმდევრობის საკითხში, თუ ეს რეკომენდაციები მიწოდებულ იქნება სასესიო პერიოდის დაწყებამდე 1 თვით ადრე. დაუშვებელია გამოქვეყნებულ სასესიო ცხრილში დადგენილი ვადების შეცვლა დეკანთან და სასწავლო დეპარტამენტთან შეუთანხმებლად.

11.8. სესიის დასრულების შემდეგ სრული ინფორმაცია სტუდენტთა აკადემიური მოსწრების შესახებ გადაეცემა სასწავლო დეპარტამენტის მიერ ანალიზისათვის ფაკულტეტის ხარისხის უზრუნველყოფის სამსახურს.

11.9. სასესიო პერიოდის დაწყებამდე 2 კვირით ადრე მიმართულების ხელმძღვანელი ფაკულტეტის ხარისხის უზრუნველყოფის სამსახურს გადასცემს მიმართულების სხდომაზე განხილულ და მიღებულ საგამოცდო ბილეთებს. ხარისხის უზრუნველყოფის სამსახური გადასცემს ფაკულტეტის დეკანატს.

11.10. სასესიო პერიოდის დაწყებამდე 2 კვირით ადრე საგნობრივი საგამოცდო კომისიის შემადგენლობას ადგენს შესაბამისი მიმართულება. მიმართულების ხელმძღვანელი საგამოცდო კომისიის წევრთა სიას გადასცემს დეკანატს.

## 12. დამატებითი სემესტრის გავლა

12.1. სტუდენტს, რომელმაც საგანმანათლებლო პროგრამით განსაზღვრულ ვადებში ვერ მოიპოვა შესაბამისი აკადემიური ხარისხი, უფლება ეძლევა თვითდაფინანსების გზით დაასრულოს სასწავლო პროგრამა მომდევნო, არაუმეტეს ოთხი სემესტრის მანძილზე.

12.2. დამატებითი სემესტრის სწავლის საფასური სტუდენტს განესაზღვრება დეკანატის წარდგინების საფუძველზე, სასწავლო კურსის/კურსების რაოდენობისა (არაუმეტეს ოთხი) და კრედიტების მოცულობის (წლიური არაუმეტეს 75-ისა) გათვალისწინებით კონსერვატორიაში დადგენილი ტარიფის შესაბამისად.

12.3. სტუდენტს, რომელიც დამატებითი სემესტრებით გათვალისწინებულ ვადებშიც ვერ დააგროვებს შესაბამისი აკადემიური ხარისხის მინიჭებისათვის საჭირო კრედიტებს, უწყდება სტუდენტის სტატუსი და იძენს კურსმოსმენილის სტატუსს, რომელიც დასტურდება აკადემიური ცნობით.

### **13. აკადემიური ხარისხის მინიჭება და დიპლომი**

13.1. უმაღლესი აკადემიური განათლების ცალკეული საფეხურის დასრულების შემდეგ კონსერვატორიის კურსდამთავრებულს ენიჭება შესაბამისი აკადემიური ხარისხი. პროფესიული პროგრამის კურსდამთავრებულს – შესაბამისი საფეხურის კვალიფიკაციას. კვალიფიკაციას, ბაკალავრის, მაგისტრის აკადემიურ ხარისხს, ანიჭებს კონსერვატორია შესაბამისი ფაკულტეტის საბჭოს წარდგინების საფუძველზე.

13.2. დეკანის წარდგინებით, პროგრამის დასრულების შემდეგ ფაკულტეტის საბჭო განიხილავს სტუდენტისათვის აკადემიური ხარისხის მინიჭების საკითხს. საბჭოს დადებითი გადაწყვეტილების შემთხვევაში ფორმდება რექტორის ადმინისტრაციული-სამართლებრივი აქტი სტუდენტისათვის აკადემიური ხარისხის მინიჭების შესახებ.

13.3. დოქტორის აკადემიურ ხარისხს ანიჭებს კონსერვატორიის სადისერტაციო საბჭო დოქტორანტურის დებულებით გათვალისწინებული წესების დაცვით, აკადემიური ხარისხის დამადასტურებელი დიპლომი გაიცემა დისერტაციის გამოქვეყნების შემდეგ.

13.2. აკადემიურ ხარისხს ადასტურებს კონსერვატორიის რექტორისა და ფაკულტეტის დეკანის მიერ ხელმოწერილი და კონსერვატორიის ბეჭდით დამოწმებული დიპლომი, სტანდარტული დანართით.

13.2. დოქტორის აკადემიურ ხარისხს ადასტურებს კონსერვატორიის რექტორისა და სადისერტაციო საბჭოს თავმჯდომარის მიერ ხელმოწერილი და კონსერვატორიის ბეჭდით დამოწმებული დიპლომი, სტანდარტული დანართით.

### **14. გარდამავალი დებულებები**

1. ამ წესის ძალაში შესვლის შემდეგ ძალადაკარგულად გამოცხადდეს კონსერვატორიის აკადემიური და წარმომადგენლობითი გაერთიანებული საბჭოს მიერ 24.09.2010 წლის სხდომაზე #1 დამტკიცებული “კონსერვატორიის სასწავლო პროცესის მარეგულირებელი წესი”.